



SIPA iza rešetaka strpala Milorada Radakovića i Goran Pejića

Uhapšeni zločinci koji su pobili porodicu heroja Ećimovića!

Prije nego što su mu ubili suprugu, oca, majku, brata i snahu, Ećimoviću su u Omarskoj zločinci zgulili svu kožu, posuli je solju i ostavili ga da umre na suncu

Pripadnici SIPA-e jučer su po naredbi Tužilaštva BiH na području Prijedora uhapsili Milorada Radakovića (53) zvanog Srbo i Gorana Pejića (50) zvanog Ledeni. Oni se sumnjiče da su 1992. godine počinili ratni zločin nad hrvatskim stanovništvom u mjestu Tukovi kod Prijedora.

Preživjela djeca

Tužilaštvo ih tereti da su, kao pripadnici policijskih i vojnih formacija, 13. juna 1992. u kući porodice Ećimović iz vatrenog oružja usmrtili pet civila hrvatske nacionalnosti. Ubistva su počinili automatskim oružjem sprigušivačima.

Radi se o Ceciliji Ećimović, supruzi Slavka Ećimovića, prijedorskog heroja, simbola pokušaja otpora agresorskim snagama, zatim njegovim roditeljima Tomislavu i Mariji te bratu Nikoli i snahi Katarini.

Djeca Slavka Ećimovića Nikola i Ivana pukom slučajnošću nisu ubijena te noći. Masakr nad hrvatskim civilima počinjen je, prema svemu sudeći, kao čin osvete, jer je tada 37-godišnji Slavko Ećimović, mladi prijedorski pogonski inženjer, bio vođa

čuvane Kurevske čete od 100 hrabrih momaka, koji su 30. maja 1992. pokušali osloboditi Prijedor napadajući 300 puta jače neprijateljske snage.

Nakon zarobljavanja, odvođenja u koncentracijski logor Omarska i brutalnog batinanja i mrcvarenja, isljednici iz tadašnje Službe javne bezbjednosti (SJB) Prijedor su Ećimoviću 9. juna bukvalno razderali svu kožu s tijela, posuli je solju te ga takvog iznijeli na plato ispred logora. Na užasnoj vrućini sol je skoro spalila Ećimovićevo tijelo, ali on ni u takvim najstrašnijim mukama, kakve ne pamti ni srednjovjekovna inkvizicija, nije odao svoje kolege, učesnike otpora koje je predvodio u vrijeme majskog napada 1992., pokušavajući odbraniti svoj grad!

Odbio Somaliju

Ećimović je, kako saznajemo, od 1980. godine bio u Legiji stranaca te se 1992. vratio u rodno mjesto odbivši da ide u Somaliju. Odlučio je braniti svoj Prijedor i BiH.

Četiri dana nakon mučeničke smrti prijedorskog heroja zločinci su riješili da mu pod okriljem noći ubiju porodicu.

Milorada Radakovića i

Gorana Pejića nakon 23 godine konačno stiže ruka pravde. Njihovo hapšenje nije iznenadilo Prijedor. Staviše, to je bilo očekivano. Jer „pola“ Prijedora iščekuje slične trenutke, što nije nimalo čudno s obzirom na razmjere genocida nad nesrbima na ovom području.

M. DEDIĆ

Nikola: Okončati proces

Nikola Ećimović jučer ujutro znao je da su ubice njegove porodice na putu ka Tužilaštvu BiH u Sarajevu. No, uzdržanost i sustegnutost koja ga je krasila više od dvije decenije i ovoga puta je izdržala pred molbom novinara za kratku izjavu:

- U ovim trenucima ne bih volio dati izjavu dok se ne okonča proces. Probajte me razumjeti. Nikoga se ne bojim, nego nije trenutak - napisao nam je Nikola Ećimović.



Iz porodičnog albuma: Cecilija i Slavko Ećimović na vjenčanju